



Beeld: ©NP/Hollandse Hoogte/Robin Utrecht

16 februari 2024

Kuminsamentu di un aña nobo ta duna espasio pa refleksyon. Nos por wak bèk riba un aña unda a tuma pasonan importante den e proseso despues di e kòma. Huntu nos ta trahando duru riba un futuro den lokual lo duna herensia di e pasado di sklabilitut e lugá ku e ta meresé. Maske e pasonan aki no semper tabata visibel mesora, nan ta krusial pa progreso mas aleu. Nos meta lo sigui ta pa buska un balansa entre presentashon di resultado konkreto i alabes hasi esaki di un forma kouteloso i inklusivo.

Na fin di 2023, e resultado di elekshon a lanta pregunta tokante kiko lo ta e base di sosten polítiko di un gabinete nobo pa tópikonan manera e pasado di sklabilitut. Tanten ku e formashon ta tumando lugá, resultado di esei lo sigui ta insigur. Te ora ku un gabinete nobo asumi poder, e gabinete demishonario aki lo sigui ku e esfuerso aktual sin kita sin pone. Huntu ku desendientenan i otro nan, nos lo sigui elaborá e akshonnan for di e reakshonnan di e gabinete i tuma mas tantu paso konkreto posibel.

Pero biniendo bèk riba kontenido di e elaborashon despues di e kòma: den e kuartal ku a kaba, huntu ku e ofisina di investigashon TrueTalk 270 nos a hiba kòmbersashon tokante e pasado di sklabilitut ku esnan direktamente envolví. Nos a papia partikularmente tokante e ideanan ku tin tokante konmemorashon i ki inisiativa sosial lo mester bini ku tin un impakto riba oumento di konosementu, konsientisashon, rekonosimentu, konmemorashon, i aserkamentu di e impakto di e pasado di sklabilitut. Ta importante pa nos usa e input di e komunitatnan pa duna forma na e areglo pa inisiativa sosial i e Komité di konmemorashon. Asina nos ta pèrkurá pa nos saka e konklushonnan korekto i esnan di mas ophetivo. Kiko e resultado di e kòmbersashonnan aki tabata i kiko nos ta bai hasi ku esei, gustosamente nos lo konta mas leu den e notisiero aki.

E aña aki, atrobe nos a kuminsá ku un seshon balioso den kua mas o ménos 70 desendiente i hende direktamente envolví a bini huntu den teatro Diligentia pa kompartí nan idea tokante e pasonan ku a tuma den e proseso despues di e kòma, te ku awor. Tambe nos a papia ku nan tokante e konsepto di e areglo pa inisiativa sosial pa Hulanda Oropeo i e forma ku tin awor pa komposishon di e komité di konmemorashon den henter Reino.

Bo tambe ke tuma parti na e kòmbersashon tokante e konsepto di e areglo? Esei ta posibel, for di 12 di februari durante 30 dia tin un konsulta via internet ta tuma luga. Mas informashon tokante esaki, i tambe tokante e komité di konmemorashon den henter Reino, bo por haña den e notisiero aki.





Seshon di diálogo

Den e aña ku ta tras di lomba, nos kolega ámtenarnan a papia hopi ku desendientenan i hende direktamente embolbí, i a haña bon idea tokante kiko mester tene kuenta kuné den realisashon di e espasio despues di e kòma; entre otro tokante e areglo pa iniciativa sosial i e komité di konmemorashon.

Pa ‘validá’ i fiha e ideanan ku a haña, nos a laga hasi un investigashon kualitativo. Ademá, nos a amplia nos partnernan di kòmbersashon dor di, fuera di e personanan envolví ku ken nos ta den kontakto komo programa, hustamente tambe bai den kòmbersashon ku hende riba kaya, hóben i adulto, i tambe pafó di e ‘Randstad’ (e parti ku mas tantu siudat grandi na wèst di Hulanda). Tin biaha, tin deskonfiansa tokante e ròl di gobièrnu. Pa e motibu ei, un diálogo for di un ofisina di investigashon neutral ta un método fuerte pa bini na entendimentu.

A hiba diálogo ku 270 desendiente, repartí den 18 dia di diálogo i algun di nan ònlain, siendo ku e prioridat tabata ku tur hende por a partisipá. E diálogonan di mas importante tabata individual, pero tambe a kompletá esaki ku kòmbersashon di mesa rondó i di Café Bepp. Un método di e ofisina di investigashon TrueTalk. Aki ta pidi hende den su ambiente natural pa bai den kòmbersashon. Por ehèmpel, TrueTalk a bishitá sentro di barío òf marshe na diferente sitio na Hulanda, unda el a organisá un fasilitat di investigashon chikitu den un ambiente di kas.

Den e investigashon a hasi uso di un variashon di edat, embolbimentu organisatorio i emosional, i trasfondo kultural. Ademá, e ofisina di investigashon a sòru pa inklushon di tur komunidad di desendiente.

Durante e kòmbersashonnan, nos ta tende i mira ku ketu bai por mira i sinti e konsekuensianan di nos pasado den presente. Nos ta tende i mira ku tin hende ku ta eksperenshá retraso di posishon sosial den sosiedat, por ehèmpel den e área di bibienda, enseñansa, i e merkado laboral.

E factsheet aki ta duna un resúmen di e ideanan ku a resultá for di e investigashon. Nos a inkluí e resultadonan aki den formulashon di e areglo di supsidio. Por ehèmpel, e areglo aki mester ta fásilmente aksesibel pa organisashon ‘grassroot’, asina ku nan no ta keda pegá den trayektonan di petishon kompliká.

Tambe, nos ta inkluí e konseptonan ora ta trata di konmemorashon. Nos lo duna e komité di konmemorashon den henter Reino e entendimentunan pa loke ta trata konmemorashon komo punto di salida. E deseo general ta ku e konmemorashon lo ta algu di tur hende. Meskos ku dia 4 i 5 di mei. I ku lo alkansá tur hulandes kuné. Pa motibu ku hustamente esei ta loke ta fortalésé entendimentu mutuo, i por konektá e komunidad ‘blanku’ i ‘pretu’. “E ta hiba na solidaridat. Rekonosementu i ekivalensia.” Por último, ta importante ku tambe tin lugá pa e diversidat kultural grandi den e diferente komunidadnan den e konmemorashon konhunto.



Situashon – areglo di supsidio inisiativanan sosial

Den e reashon di gabinete di 19 di desèmber 2022 riba e rapòrt "Ketenen van het Verleden" (Kadenanan di Pasado), gabinete a anunsiá un areglo di supsidio.

Intenshon di esaki ta pa sostené iniciativa dirígí riba konsientisashon, rekonosementu, konmemorashon, òf impakto di e pasado di sklábitut transatlántiko.

Pa e areglo aki a pone €100 mion disponibel pa un solo biaha. Lo spleet e €100 mion disponibel den tres parti: €33,3 mion pa Hulanda Oropeo, €33,3 mion pa e parti Karibense di Reino, i €33,3 mion pa Sürnam.

Pa yega na punto di salida bon pa e areglo di supsidio, a papia ku diferente persona i organisashon for di e komunitatnan embolbí. I e diálogonan ku 270 desendiente, plamá rònt Hulanda Oropeo for di diferente grupo di edat, a resultá den bon konsepto. Por ehèmpel, e areglo aki mester ta fásilmente aksesibel pa organisashon ‘grassroot’, asina ku nan no ta keda pegá den trayektonan di petishon kompliká.

E areglo tin atenshon spesial pa promoshon di organisashon ‘grassroot’ di desendiente i pa komunitatnan embolbí. Dor di hasi un ‘voucher’ disponibel, nan por sigui profesionalisá i fortalésé nan organisashon mas aleu.

Ademas, e areglo ta destiná pa iniciativa sosial ku ta enfoká riba fortalamentu di e komunitat di desendiente di hende sklabisá i selebrashon i oumento di nan resiliensia.

Pero tambe pa proyektonan mas grandi ku tin un impakto signifkativo riba oumento di konosementu, konsientisashon, rekonosementu, konmemorashon, i e aserkamentu di e impakto di e pasado di sklabitut.

Lo formulá areglonan apart na midí pa e parti Karibense di Reino i pa Sürnam. Pa e areglo pa e parti Karibense di Reino, por tuma over e puntonan di salida for di e areglo di Hulanda Oropeo.

Planifikashon

- Na febrüari, e areglo ta bai den konsulta via internèt pa un periodo di un luna. Na febrüari bo por reakshoná via e [lenk](#) aki.
- Dia promé di yùni lo publiká e areglo den Staatscourant.
- Dia promé di yùli lo habri e promé periodo pa petishon. Na tur, tin 6 periodo.
- Pa e parti Karibense di Reino ta spera ku lo por anunsiá e areglo den verano di 2024. Lo publiká e areglo pa Sürnam despues. E empeño ta si pa hasi esaki den 2024.

Situashon – Komité di konmemorashon

Manera a anunsiá den e reakshon di Gabinete di 19 di desèmber di aña pasá, lo lanta un komité di konmemorashon den henter Reino, ku lo supervisá elaborashon i organisashon di un konmemorashon di e pasado di sklabitut permanente, digno i mas grandioso.

E empeño ta di tin e komité di konmemorashon operashonal den verano di 2024. Lo lant’e den bon konsulta ku komunitat. Fuera di konseheronan direktamente embolbí, tambe a konsultá ku 270 desendiente tokante e tópiko aki den e seshonnan di diálogo.

E parti di mas grandi di e partnernan di kòmbersashon no tabatin un idea konkreto di konmemorashon òf iniciativa. E liña kòrá tabata riba un nivel mas profundo; hopi partner di kòmbersashon a papia tokante e problema mas grandi di desigualdat ku inisiativanan òf forman di konmemorashon lo mester trata kuné. A papia mucho mas tokante rekonosementu i konekshon. Rekonosementu no tabata trata solamente di rekonosementu di e storia kompleto di sklabitut, sino tambe di rekonosementu di e impakto sosioekonómiko, sosial, i sikológiko ku e pasado di sklabitut tin te ainda den bida di desendentenan. Rekonosementu tambe ta krea espasio pa konekshon paden di i entre komunitatnan (blanku i pretu).

Aki 10 aña, sigun hopi hende konmemorashon en todo kaso lo mester ta di tal manera ku hulandes blanku tambe lo sinti su mes embolbí. Algu “ku ta di tur hende”. “Mester alkansá tur hulandes kuné.” Esaki ta fortalésé kompreshon di tur dos banda i por trese konekshon entre e komunitat ‘blanku’ i ‘pretu’. “E ta hiba na solidaridat. Rekonosementu i ekivalensia.”

E gran diversidat kultural di e diferente komunitatnan tambe mester tin un lugá den e konmemorashon.

For di e investigashon ta bin dilanti ku konmemorá ta importante, e ta duna espasio pa reflekshon, i pa ta huntu. Pa kompartí storia. I tambe pa selebrá libertat

huntu (maske esei no mester ta riba mesun dia pa tur hende). "Konmemorá ta pa no lubidá pasado. Mostra rèspèt pa loke a pasa".

Esaki i mas konsepto ta ofresé un bunita punto di salida pa e komité di konmemorashon kuminsá traha riba dje. Awor lo investigá e elaborashon di e komité.

Kampaña ònlain 'Historia di nos tur'

Mas kòmbersashon entre hende i konsientisashon tokante nos pasado kompartí. Pa e motibu ei, Ministerio di Enseñansa, Kultura i Siensia na desèmber a start e kampaña ònlain 'Geschiedenis, van ons allemaal' (Historia, di nos tur). Sentral den e kampaña aki ta storianan personal di hende tokante e pasado di sklabilitut i e impakto di esaki den presente. [Kantante Shirma Rouse i sineasta Safi Graauw](#) a kuminsá, dor di bai den kòmbersashon ku otro tokante historia di nan famia i e importansia di konmemorashon. Entretantu, a publiká e kòmbersashon entre dosente [Lucelle Comvalius i ilustrador George Adegite](#). Kompartimentu di e storianan aki ta parti di e Aña di Konmemorashon Pasado di Sklabilitut. Den e tempu benidero, mas duo lo konta nan storia. Asina, Hesdy Lonswijk (direktor di esena), Carmen Felix (eskritor), Lukas Eleuwarin (diseñadó di moda), Jill Mathon (eskritor), Prof. Soortkil (e.o. eskritor), Lex Bohlmeijer (presentadó), Stefanie Albertzoon (aktris i artista) i Charissa Chotoe (presentadó i poeta) for di nan perspektiva lo konta tokante e pasado di sklabilitut. Lo kompartí e storianan riba OCW-verhalen.nl i e kanalnan di medio sosial di e ministerio.

Minister Robbert Dijkgraaf (Enseñansa, Kultura i Siensia) tokante e kampaña aki: "Nos konosé e poder di storianan for di komienso di humanidat. For di mi propio eksperensia, mi sa ku hopi hende ta habrí pa kòmbersashon tokante nos historia kompartí, i tambe kon difísil ta tin biaha pa haña e palabranan bon pa hasi esei. Esei por ta un drèmpi basta grandi. Mi ta spera ku e storianan personal aki, kontá for di diferente perspektiva, lo baha e drèmpi ei i sòru pa konekshon. Podisé, awor esei ta ainda mas importante ku nunca."



Enviado Especial Pasado di Sklabilitut pa Sürnam

E di seis bishita na Sürnam di e Enviado Especial (**Spesiaal Gezant**) Pasado di Sklabilitut Frédéricque de Man, e biaha aki a tuma lugá huntu ku Hefe di Bureau Democratie (Ofisina Demokrasia) di e Ministerio di Asuntunan Interno i Relashon den Reino, Thomas Zandstra. E bishita konhunto aki tabata hopi útil pa interkambio di idea tokante contenido i kompartimentu di konosementu, entre otro debí ku tabatin interkambianan intensivo di konosementu entre desendientenan na Sürnam i na Hulanda.

Hopi di e kòmbersashonnan tabata tokante e Plataforma Pasado di Sklabilitut (den formashon). E plataforma aki, ku ta konsistí di representante di algun organisashon sosial, lo guia e diálogo tokante elaborashon di maneho despues di e kòma i destinashon di e dos fondonan.

Frédéricque de Man i Thomas Zandstra tambe a bishitá algun plantashi i tabatin kòmbersashon ku desendientenan einan.

Sekretario di Estado Alexandra van Huffelen den kòmbersashon ku desendientenan na Leeuwarden i Vlissingen

Komo mandatario ku ta kordiná e programa Pasado di Sklabilitut i e proseso 'despues di e kòma', Sekretario di Estado Alexandra van Huffelen kada luna lo bishitá diferente sitio unda e pasado di sklabilitut a hunga un papel grandi den historia. Den e periodo ku ta tras di lomba el a bishitá Leeuwarden i Vlissingen.

Riba 13 di desèmber, huntu ku comité 30 juni/ 1 juli (e komité 30 di yüni/ promé di

yüli) i 'burgemeester' Sybrand Buma na Leeuwarden, a papia tokante e impakto i e konsekuensianan di e pasado di sklabbitut. A bishitá un obra di teatro titulá 'Tinten'. Un obra di teater ku ta hasi e influensia di koló diskutibel dor di kompartí un storia personal i hiba un kòmbersashon habrí ku hóbennan.

'Mi deseo ta ku esaki ta e delaster generashon ku ta hañ'e ku diskriminashon i rasismo. E bishita aki ta mustra ku nos mester sigui invertí den esaki sin kita sin pone, pa hasi un posishon ekivalente den nos sosiedat posibel pa tur hende', asina e Sekretario di Estado a bisa.

Dia 8 di yanüari 2024, el a bishitá e Museo Marítimo di Vlissingen. Aya el a kombersá ku algun desendiente tokante e pasado di sklabbitut den tempu di awor. Kòmbersashonnan impreshonante ku ta demostrá ku rekonosementu i konmemorashon ta esensial pa un sosiedat hustu.

I dia 29 di yanüari 2024, e Sekretario di Estado a bishitá Delft, e siudat ku dia 19 di desèmber 2023 tambe a pidi diskulpa pa su ròl den e pasado di sklabbitut. Den e siudat e tabatin enkuentro ku investigadónan, e 'wethouder' responsabel, pero partikularmente tambe ku e komité di 'kwartiermaker' i desendiente ku ta biba den e siudat. Nan a papia tokante e reflekshon lokal di e pasado di sklabbitut riba e sosiedat di awor, i kiko sigun nan ta nesensario. Un di e inisiativanan planiá di e siudat ta pa lanta un lugá di konmemorashon.



Pa finalisá

Tin tópikonan ku bo tin gana di lesa un otro biaha den e notisiero aki, òf bo ke drenta den kòmbersashon ku nos? Pa nos lo ta un plaser pa tende esei. Bo por aserká nos via: PostbusProgrammaSlavernijverleden@minbzk.nl